

# INUIT ATAQATIGIIT



UKA2019/32

05. november 2019

Peter Olsen

**Nunatta inuiattut timersornikkut unammersuarterfissaanik FIFA-p piumasaqaataanut naapertuuttumik pilersitsinerup avataaniit aningaasaliisussarsiuunnissaanut periarfissanik aningaasalersueriaasissatut ilusissamillu misissuisussanik suleqatigiisitamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Suleqatigiissitaq aningaasalersuinissamik misissuinerup inerneranik UKA2020-imi Naalakkersuisut Inatsisartunut saqqummiutissagaat.**

(Inatsisartunut Ilaasortaq Anders Olsen, Siumut)

Inatsisartunut Ilaasortap Anders Olsenip aaliangiiffigisassatut siunnersuutaanut, qulani pineqartumut soqutiginarluinnartumut pingaaruteqarluinnartumullu qujariarluta, matumuuna Inuit Ataqatigiinniit naatsumik imaattumik oqaaseqaateqassaagut.

Naluneqanngitsutut 2015-imi Inatsisartut Upernaakkut Ataatsimmiinnitsinni nunatta inuiattut timersornikkut unammersuarterfissaanik qulisamik "Nationalstadion"-imik pilersitsinissaq pillugu Naalakkersuisut nassuiaasioqqullugit Anders Olsenip siunnersuuteqarpoq, uagullu siunnersuut tamanna tapersorsorlutigu akuersaarlutigulu ingerlateqqissimavarput.

Naluneqanngitsutullu tamatuma kingorna Ukiakkut 2016-mi Naalakkersuisut pilersaarummik nassuiaammik imaqarluartumik, sanaartorerup nalaani aammalu aallartinnginnerani suut suliarineqarnissaannik imaqartumik Inatsisartunut agguaassipput.

Timersorneq peqatigiiffilerinerlu inuiaqatigiinnut tamatsinnut qanoq pingaaruteqartiginersoq tamatta isumaqatigiissutigisinnaanngutsiarparput. Apeqquserneqarsinnaanngilaq timersornerup peqqissusermut qanoq pingaarutiginera. Politikki partiillu tassaapput inuiaqatigiinnik assigiinngitsunik assortuutitsillutillu avissaartuutitsisartut. Illuatungaanili timersorneq inuiaqatigiittut ataasioqatigiinnermik pilersitsisarluunilu ataatsimoornermik misigilersitsisartuq tamatta nalunngilluinnarparput. Ataatsimoornerulersitsiinnarani, timersorneq tassaavoq inuiaqatigiittut timikkut tarnikullu nukittunerulernissatsinnut aqqutissatsialassuaq.

Taamaattumik suliniutit suulluunniit pitsaasut aammalu timersornermut tunngasuteqartut tamaasa avissaartuuffiginatigit suleqataaffigalugit ataatsimoorfigitigit.

Taamaattumik tamanna pillugu annerusumillu oqaaseqarfigeqqinnagu Anders Olsenip siunnersuutaa Inuit Ataqatigiinniit akuersaarlugu ataatsimiititaliamut susassaqartumut taama isikkoqartillugu ingerlateqqipparput.

Qujanaq. In.In. Peter Olsen